


74
6348
1





三國會要



三國會要



門 7 4  
號 6348  
卷 1

經  
庫

光緒庚子秋曰  
汪蘇書局刊成

昭和十一年  
十一月十日  
購求

三國會要敘例

黃巖楊晨謹

聞之師曰歷代史書莫尚乎志因革損益朝章系焉馬  
枹八書班分十志陳壽良史顧乃闕遺置斯不作蓋有  
深意蜀承漢制可省作志如據  
魏制為志則正統淆矣晉宋綴緝略而弗詳歷  
禩縣遠益復難攷郝氏續漢八錄虛譚取材兩書以為  
蜀志究而言之蜀雖承漢命官制度間亦變更豈況魏  
吳互有增損近人湯氏名成作季漢書志稍謹嚴巍吳  
蓋闕錢氏名儀會要具見其敘采錄未廣橐已缺殘不  
揣溝瞽踵法徐氏刺取羣籍條系為書冀以補承祚之

三國會要

敘例

一



三國會要 卷之二  
餘例  
一  
缺文存三國之遺制大雅君子理而董之

三國之制宋志而外通典爲詳唐宋類書展轉互販裴注所載溢出亦希今據本書徵引諸史故書雅記極意芻搜一事可稽竝爲甄錄瑣聞軼事雜錄附焉

三國上沿漢制下啟晉儀斷代爲書良非易易本書所有旣必輯存網羅舊聞尤貴詳案漫無限制亦未敢出也

臺官訪議儒生讓論縱有傳書非必定制意在纂事不復纂言魏武諸令葛侯兵政當時敝用則酌錄焉

春秋義例名从主人旣錄原書未能顛若得失優劣付諸史評體裁旣殊奚敢馮朶

裴注本書間有牴牾采摭旣富執難求全非盡糾繩亦與甄錄過而存之倏哉言乎

本朝儒先輯補精案洪氏父子具有成書曷域職官多可依據閒坵辨訂希爲諍臣侯氏藝文無關宏愔辨誤補注攷異劄記凡有芻涉取資博聞

唐宋五代均有會要徐氏兩漢門類整齊今之分目尤取該摭使命獻質因事爲篇綜厥大端就正有道綴橐



未定敢質言之

卷首	敘例	目錄	引用書目
卷一	帝系上	<small>諡號</small>	<small>后妃</small>
卷二	帝系下	<small>親屬</small>	<small>宗室</small>
卷三	麻法		<small>外戚</small>
卷四	天文		
卷五	五行		
卷六	方域上	<small>總敘</small>	<small>形勢</small>
卷七	方域中	<small>宮苑</small>	<small>渠堰</small>

三國會要目錄

卷首 敘例 目錄 引用書目

卷一 帝系上 諡號 后妃

卷二 帝系下 親屬 宗室 外戚

卷三 麻法

卷四 天文

卷五 五行

卷六 方域上 總敘 形勢

卷七 方域中 宮苑 渠堰



卷八 方域下 郡國

卷九 職官上 公卿 庶職

卷十 職官下 武秩 郡國官 封爵

卷十一 禮上 吉禮

卷十二 禮中 凶禮 軍禮 賓禮

卷十三 禮下 嘉禮 輿服

卷十四 樂

卷十五 學校

卷十六 選舉

卷十七 兵 軍制 舟師

卷十八 刑 附赦

卷十九 食貨 屯田 賦稅 錢幣 鹽鐵

卷二十 庶政上 戶口 風俗

卷二十一 庶政下 使命 質任 貢獻

卷二十二 四夷

子幼承庭訓雅好陳書曾著校錄一編復欲輯為會要丙戌秋史館多暇勑立此稿咨訪通人惟桂林唐春卿前輩 景崇 攷證古書瑞安孫仲容內兄 詒讓 商



權義例餽益實多已亥秋攜至吳門同邑林蔚生大令丙修主管書局謂兩漢唐五代會要皆有刊本從

與附刊助成者濮子淦同年子潼陳子厚家惠齋

子和及門光校戲者劉子藩家學博俞弁山孝

廉鎮李挺生姻兄一鶚也庚子七月刊成記之子祖

誥孫紹翰臺侍

卷十八 卷十九 卷二十 卷二十一 卷二十二 卷二十三 卷二十四 卷二十五 卷二十六 卷二十七 卷二十八 卷二十九 卷三十

引用書目

尚書正義 漢書注 魏書

左傳正義 後漢書 南史

禮記正義 續漢書志劉昭注 北史

禮書 晉書 隋書

樂書 宋書 唐書

讀禮通考 南齊書 宋史

五禮通考 梁書 遼史

史記索隱 陳書 通鑑胡三省注



華陽國志

方輿勝覽

滿洲原流考

宋朝事實

輿地廣記

西域考古錄

朝野雜記

讀史方輿紀要

唐六典

開元占經

洛陽伽藍記

西漢會要

玉燭寶典

鄴中記

東漢會要

水經注

長安志

唐會要

元和郡縣志

景定建康志

通典

太平寰宇記

蠻書

通志

輿地紀勝

蜀鑑

通考

續通考

六朝事迹

抱朴子

玉海

孫子十家注

金罍子

困學紀聞

武備志

世說

記纂淵海

李衛公兵法

拾遺記

古今注

唐律疏義

博物志

中華古今注

元經 薛氏傳

聞見記

演繹露

風俗通

述異記

春明退朝錄

傅子

意林

齊民要術

桓譚新論

史通



顏氏家訓

說郛

大觀本草

名臣奏議

玉函山房輯佚書

九章算術

羣書治要

集古錄

雲麓漫鈔

初學記

金石錄

鼎錄

北堂書鈔

隸釋

癖談

六帖

金石萃編

禁扁

藝文類聚

石經考

方言

太平御覽

國山碑考

廣韻

冊府元龜

平津館讀碑記

韓昌黎集

司馬溫公集

三國文類

諸史然疑

蘇東坡集

上古至六朝文

廿二史劄記

薛浪語集

日知錄

咳餘叢考

文選

潛邱劄記

癸巳類稿

廣文選

經史問答

郝氏遺書

文心雕龍

義門讀書記

諸史考異

古文苑

後漢書補注

讀書叢錄

續古文苑

十七史商榷

東塾讀書記

文館詞林

廿二史考異

南北史補志



歷代名臣傳

百三名家集

曝書亭集

銅尉斗齋筆記

養新錄

渤海疆域考

蜀中名勝志

朝鮮志

日本金石志

日本通史

續後漢書

蕭常 郝經

季漢書

湯成烈 稿本

三國志辨證

補注

補疆域志

職官表

職官考

藝文志

攷證

旁證

證聞

校補

考證 齊召南 稿本

凡裴注所引書今已逸者据注不具列引書有刪節無增改

三國會要卷一

黃巖楊晨纂

帝系 諡號

魏太祖曹操字孟德

一名吉利 小字阿瞞

沛國譙人曾祖節字元

偉處士

按本書操女名節為漢獻帝后不應上同祖諱 故陳景雲以藝文類聚引續漢志作萌為是三

國志證聞引趙氏一清曰後漢宦者傳曹節字漢豐南陽新野人安得有兩曹節俱于桓靈世為宦官騰亦為節養子按證聞引趙說非也宦者傳先騰後節郡縣不同漢豐封華容侯傳國魏世豈得以處士誣其祖乎黃初四年立太皇帝廟以處士與祖騰字季興漢中常侍大長秋封費亭侯加特進追諡曰高皇帝父嵩字巨高為騰養子莫能審其生出本末 裴注引吳人所作曹瞞傳及郭頌世語並云夏



侯氏之子夏侯惇之叔父惟陳氏既不取此說敵國傳聞恐難信也官至太尉追諡曰大皇帝操舉孝廉為郎由郡守徵為典軍校尉董卓之亂潛歸陳留初平元年從袁紹等起兵稱欲誅卓為東郡太守興平二年拜兗州牧建安元年奉迎獻帝都許為大將軍封武平侯十五年為丞相十八年為魏公二十一年進爵魏王二十五年正月卒年六十六子丕嗣十月廢帝為山陽公篡位追諡操為武皇帝廟號太祖葬高陵

文皇帝丕字子桓武帝長子建安十六年為五官中郎

將副丞相二十二年立為魏太子受禪於繇昌都洛陽改元黃初七年卒年四十追諡為文皇帝廟號世祖葬首陽陵

明皇帝叡字元仲封平原王以母甄夫人誅故未建為  
 享七年文帝病篤乃立為皇太子遂即帝位改元三太和  
六年青龍四年景初三年卒年三十六追諡曰明皇帝廟號烈祖葬高平陵

齊王芳字蘭卿明帝無子養王及秦王詢宮省事祕莫有知其所由來者魏氏春秋曰或云任城王楷子青龍三年立為齊王



景初三年帝病甚乃立為皇太子遂即帝位改元二

正始

九年嘉平六年為司馬師所廢

魏世譜曰晉受禪封為邵陽縣公

厲公

高貴鄉公髦字彥士文帝孫東海定王霖子正始五年

封鄴縣高貴鄉公齊王廢迎立之改元二

正元二年為甘露五年

司馬昭所弒年二十葬以王禮

陳留王奐初名璜字景明燕王子甘露二年封安次

縣常道鄉公迎立嗣明帝後改元二

景元四年為司馬

炎所篡

魏世譜曰封為陳留王年五十八太安元年卒諡曰元皇帝

先主姓劉諱備字玄德涿郡涿縣人漢景帝子中山靖

王勝之後也

按此書法直以先主承漢統其稱蜀志不得已也

勝子貞元狩六

年封涿縣陸城亭侯坐酎金失侯因家焉

攷異云是二年亭字衍典

略曰侯

祖雄父宏世仕州郡雄舉孝廉官至范令先主

少孤靈帝末討黃巾賊積功至平原相豫州刺史兼領

徐州遷左將軍建安十九年領益州牧二十四年羣下

表為漢中王明年

庚子

曹丕篡位傳聞漢帝見害發喪制

服又明年

辛丑

即位于成都改元章武秋帥師伐吳三年

癸卯四月殂于永安宮年六十三葬惠陵



後主諱禪字公嗣初為皇太子即位時年十七改元四

建興十五年延熙二十一年降于魏封安樂縣公晉太始七年卒于洛陽蜀記云公

諡曰思子恂享

吳主孫權字仲謀吳郡富春人祖鍾父堅字文臺吳書曰堅

世仕吳家葬城東為郡縣吏討賊有功拜長沙太守封

烏程侯行破虜將軍從袁術討董卓入洛修漢諸陵初

平三年討劉表為黃祖軍所殺年三十七追諡武烈皇

帝長子策字伯符興平元年募軍從術平定江東為討

逆將軍封吳侯建安五年欲襲許迎漢帝未發為盜所

殺年二十六追諡長沙桓王弟權繼之據荆揚交州黃

初二年降魏封吳王明年拒魏改年黃武七年稱皇帝

又改元五黃龍三年嘉禾六年赤烏十三年太元一年神鳳一年卒年七十一諡

曰大皇帝廟號太祖葬蔣陵

孫亮字子明權少子嗣位改元三建興一年五鳳二年太平三年為孫

綝所廢年十六為會稽王後自殺

孫休字子烈權第六子封琅邪王迎立改元永安七年卒年

三十諡曰景皇帝

孫皓字元宗一名彭祖字皓宗權孫太子和之子封烏程侯迎

諡號



立改元八

元興一年甘露一年寶鼎三年建衡三年降

于晉

封歸命侯太康五年卒一云四年

魏后妃

傳曰漢制帝祖母曰太皇太后帝母曰皇太后帝妃曰皇后其餘內官十有四等魏因漢法母后之號皆如舊制自夫人以下世有增損太祖建國始命王后其下五等有夫人有昭儀有婕妤有容華有美人文帝增貴嬪淑媛修容順成良人明帝增淑妃昭華修儀除順成官太和中始復命夫人登其位於淑妃之上自夫人以下

爵凡十二等貴妃夫人位次皇后爵無所視淑妃視相國爵比諸侯王淑媛視御史大夫爵比縣公昭儀比縣侯昭華比鄉侯修容比亭侯修儀比關內侯婕妤視中二千石容華視真二千石美人視比二千石良人視千

石

按曹爽傳有才人嘉平六年紀注有保林

武帝卞皇后琅邪人文帝母也本倡家太祖納為妾建

安初丁夫人廢

魏略曰太祖始有丁夫人又劉夫人生子修早終丁養子修子修亡於穰丁常

言殺我兒哭泣無節太祖忿之遣歸家太祖就見之踞機不應遂與絕後太后為繼室私迎夫人延以正坐而已下遂為繼室諸子無母者皆令養之二十四年拜為



王后文帝踐阼尊曰皇太后稱永壽宮明帝即位尊曰  
太皇太后太和四年崩合葬高陵

文昭甄皇后無極人袁紹子熙納之及冀州平文帝納  
后生明帝黃初二年賜死葬於鄴明帝即位追謚別立  
寢廟改葬朝陽陵

文德郭皇后廣宗人早失二親喪亂流離沒入銅鞮侯  
家得入東宮文帝為嗣后有謀焉及踐阼立為后棧潛  
上疏曰聖哲慎立元妃必取先代世族之家若隗愛登  
后使賤人暴貴恐後世下陵上替也不從明帝即位尊

為皇太后稱永安宮青龍三年崩於許昌葬首陽陵西

漢晉春秋曰甄后之誅由郭后之寵明帝怒逼殺之趙翼辨此非實蓋明帝雖恨郭猶以先帝所立崇以虛名徒居許昌未逼殺也

李貴人 陰貴人 又文帝踐阼後山陽公奉二女以

嬪於魏位號未詳

明悼毛皇后河內人選入東宮明帝即位為貴嬪太和  
元年立為皇后景初元年賜死然猶加謚葬愍陵

明元郭皇后西平人黃初中本郡反叛沒入宮明帝即  
位拜為夫人帝疾困立為皇后齊王即位尊為皇太后



稱永甯宮值三主幼弱宰輔統政與奪大事皆先咨啟於太后而後行毋邱儉鍾會作亂咸假其命而以為辭景元四年崩葬高平陵西

虞妃河內人初明帝為王納為妃即位虞不得立為后下太后慰勉焉虞曰曹氏自好立賤未有能以義舉者也不能以善始未有能令終者也殆必由此亡國喪祀矣遂絀還鄴宮

洛陽宮明帝於列殿之北立八坊諸才人以次序處其中貴人夫人以上轉南附焉其秩石擬百官之數帝常游

宴在內乃選知書可付信者為女尚書使典省外奏事處當畫可自貴人以下至尚保及給掖庭灑掃習伎歌者各有千數又錄奪士女已嫁者還以配士既聽以生口自贖又簡有資色者內之掖庭魏略

北宮皇太后居嘉平六年紀注

皇太后還北宮

西宮魏略遣使授齊王璽綬出就西宮甘露五年太后令有欲入西宮殺吾云云時太后亦居西宮

黃初三年詔曰婦人與政亂之本也自今以後羣臣不得奏事太后后族之家不得當輔政之任又不得橫受茅土之爵以此詔傳後世若有違背天下共誅之



高貴鄉公死太后臨朝甘露五年羣公奏太后曰殿下聖德光隆甯濟六合而猶稱令與藩國同請自今殿下令書皆稱詔制如先代故事

黃初七年五月丙辰帝疾篤遣後宮淑媛昭儀以下歸於其家

楊阜傳迭遷少府上疏欲省宮人諸不見幸者乃召御府吏問後宮人數吏守舊令對曰禁密不得宣露阜怒杖吏一百數之曰國家不與九卿為密反與小吏為密乎案此可知宮人籍在御府而少府領之

太子有妃有良娣有孺子妾凡三等魏晉以後咸遵之

初學記

皇后有璽綬 貴人金印藍紱御覽引魏武內戒令

蜀后妃

先主甘皇后沛人初納為妾先主數喪嫡室常攝內事產後主卒葬南郡章武二年追諡皇思夫人丞相亮上言尊號昭烈皇后與帝合葬制可

先主吳皇后陳留人先主既定益州孫夫人乃還吳於是納后為夫人章武元年策為皇后後主即位尊為皇



太后稱長樂宮延熙八年薨合葬惠陵

穆諡

孫夫人孫權妹以妻先主妹才捷剛猛有諸兄之風侍

婢百餘人皆親執刀侍主先主每入心常凜凜法正傳夫

人驕豪多將吳吏兵縱橫不法先主以雲嚴重必能整

齊特任掌內事權聞備西征大遣舟船迎妹夫人內欲

將後主還吳雲與張飛勒兵截江乃得後主還趙雲別傳

後主敬哀張皇后飛長女章武元年納為太子妃建興

元年立為皇后薨葬南陵

後主張皇后敬哀妹入為貴人延熙元年策為皇后咸

熙元年遷洛陽

王貴人太子璿母

李昭儀見漢晉春秋

董允傳後主常欲採擇以充後宮允以為古者天子后

妃之數不過十二今嬪嬙已具不宜增益終執不聽後

主嚴憚之

劉琰傳妻胡氏入賀太后太后令特留胡氏經月乃出

胡有美色琰疑其與後主有私呼卒五百搥胡棄遣坐

下獄自是大臣妻母朝慶遂絕



吳后妃

孫堅吳夫人吳主權母本吳人徙錢塘權少年統業夫人助治軍國甚有補益建安七年志林曰案后十二年薨臨薨引見張昭等屬以後事合葬高陵追謚武烈皇太后

吳主權謝夫人山陰人聘為妃後納徐氏欲令下之不肯由是失志早卒

徐夫人富春人

權姑之孫

初適陸尚尚卒權聘為妃令子登後以妒忌廢處吳卒

步夫人淮陰人權欲以為后而羣臣議在徐氏權依違

者十餘年然宮內皆稱皇后親戚上疏稱中宮及薨臣下緣指請追正名號乃贈印綬葬蔣陵

王夫人琅邪人生和為太子將立為后而全公主譖毀以憂死和子皓立追尊曰大懿皇后

王夫人南陽人生休太子和母貴諸姬有寵者皆出居外夫人出居公安卒休即位追尊曰敬懷皇后改葬敬陵

潘夫人句章人生亮赤烏十三年亮為太子明年立為皇后權不豫夫人使問呂后專制故事宮人共縊殺之



合葬蔣陵

袁夫人術女有節行而無子權數以諸姬子與養之輒

不育

吳錄亦見術傳

孫亮全夫人全尚女亮立為皇后孫繼廢亮為會稽王

後又黜為侯官侯夫人隨之國

孫休朱夫人據女休姊公主所生孫繼廢亮立休夫人

為皇后休卒羣臣尊為皇太后孫皓即位月餘貶為景

皇后稱安定宮甘露元年見逼薨合葬定陵

皓傳曰朱氏亡不在

正殿於苑中  
小屋治喪

孫和嫡妃張氏和既廢為南陽王孫峻輔政徙居新都

賜死張氏亦自殺

何姬句容人生皓和賜死姬遂拊育皓及其三弟皓即

位尊為昭獻皇后稱升平宮月餘進稱皇太后

孫皓滕夫人胤之族女聘為妃即位為皇后後寵衰供

養升平宮長秋官僚備員而已受朝賀表疏如故天紀

四年隨皓遷洛陽

又張美人布女後見殺復奪其姊馮純妻入宮拜為左

夫人

見江表傳

又左夫人王氏

見孫奮傳



三國會要卷一終

三國會要卷二 魏親屬 黃巖楊晨纂

帝系

魏親屬

武皇帝二十五男卞后生文帝及彰植熊劉夫人生昂  
鑠環夫人生沖據宇杜夫人生林袞秦夫人生玆峻尹  
夫人生矩王昭儀生幹孫姬生子上彪子勤李姬生子  
乘子整子京周姬生均劉姬生子棘宋姬生徽趙姬生  
茂

任城威王彰初封鄢陵侯黃初二年進為公三年立為



任城王四年薨世說新語為文帝毒死葬賜鑾輅龍旗虎賁百人

子楷嗣徙封中牟五年改封任城縣太和六年改封任

城國後徙濟南

陳思王植初封平原侯徙臨菑黃初二年貶爵安鄉侯

改封鄆城侯三年立為鄆城王四年徙封雍邱太和元

年徙封浚儀二年還雍邱三年徙封東阿御覽引植遷都賦曰號則

六易居實三遷六年封為陳王薨子志嗣徙封濟北王

蕭懷王熊早薨追封諡子炳嗣薨無子國除

豐愍王昂弱冠隨太祖南征為張繡所害無子以均子

琬為後追封諡琬襲爵薨子廉嗣

相殤王鑠早薨追封子潛嗣薨子偃嗣無子國除

鄧哀王冲年十三卒太祖愛之贈騎都尉為聘甄氏亡

女與合葬命據子琮為後追封諡

彭城王據初封范陽侯進為公黃初三年為章陵王徙

義陽又以母環太妃彭城人徙封彭城又徙濟陰五年

改封定陶縣太和六年復封彭城

燕王宇太和六年定封子奐入繼大宗

沛穆王林太和六年定封子緯嗣



中山恭王袞太和六年定封青龍三年薨子孚嗣

濟陽懷王珪初封侯早薨無子以林子贊襲亦早薨文

帝以贊弟壹紹珪後追進珪爵諡壹薨子恆嗣

陳留恭王峻太和六年定封薨子渙嗣

范陽閔王矩早薨追封以均子敏為後薨子焜嗣

趙王幹太和六年定封

臨邑殤公子上

疑史失名

早薨無後追封諡

楚王彪太和六年進封初彪來朝犯禁削縣三青龍二  
年大赦復所削縣嘉平元年王淩謀迎彪都許昌遣傅

及侍御史就國案驗廷尉請徵彪治罪於是使兼廷尉

大鴻臚持節賜彪璽書切責乃自殺妃及諸子免為庶

人徙平原官屬及監國謁者皆伏誅國除為淮南郡後

封彪世子嘉為常山真定王

剛殤公子勤 靈殤公子京 廣宗殤公子棘 穀城

殤公子乘 並早薨無後太和五年追封諡

郿戴公子整奉從叔父紹後封郿侯薨無子追進爵以

據子範為後薨無後以範弟東安鄉公闡為郿公奉整

後



樊安公均奉叔父薊恭公彬後封侯追進爵子抗嗣徙封薊公又徙屯留子謙嗣

東平靈王徽奉叔父朗陵哀侯玉後封侯太和六年進封子翕嗣

樂陵王茂初封亭侯改封侯及公文帝世獨不王太和元年詔封聊城王正始五年徙樂陵

文皇帝九男甄皇后生明帝李貴人生協潘淑媛生蕤朱淑媛生鑿仇昭儀生霖徐姬生禮蘇姬生邕張姬生貢宋姬生儼

贊哀王協早薨追封子尋嗣薨無子國除

北海悼王蕤明帝卽位立為陽平縣王太和六年改封以琅邪王子贊為後封公正始七年徙封文安王

東武陽懷王鑿黃初中立薨無子國除

東海定王霖太和六年定封子啟嗣高貴鄉公髦亦霖子入繼大宗

元城哀王禮黃初中封薨以任城王楷子悌為後改封梁王

邯鄲懷王邕黃初中封薨以楷子温為後改封魯陽王



清河悼王貢 廣平哀王儼 並黃初三年封薨無子  
國除

明帝子

清河王問立未幾即薨

繁陽王穆太和二年立三年薨

安平哀王殷一歲薨追封

齊王芳 秦王詢青龍三年立 紀云明帝無子養芳

及詢宮省事祕莫有知其所由來者 魏氏春秋曰或

云任城王楷子

太祖女清河長公主適夏侯楙

安陽公主適荀惲

金鄉公主適何晏

晏以尚主賜爵為列侯魏末傳  
公主即晏同母妹裴注非之

文帝女東鄉公主

明帝女平原懿公主

名淑追封謚懿為立廟取甄后亡  
從孫黃與合葬追封黃列侯以夫

人郭氏從弟惠為後承甄氏  
姓封為平原侯襲公主爵

齊長公主適李韜

公主適任愷

雜錄



黃初三年初制封王之庶子為鄉公嗣王之庶子為亭侯公之庶子為亭伯五年改封諸王皆為縣王太和六年改封諸王皆以郡為國

漢魏以來皇太子在不立太孫但封王耳 唐會要

魏略植上書曰居藩國之任為置卿士屋名為宮冢名為陵

中山王袞傳文學防輔相與言曰受詔察公舉錯有過當奏及有善亦當以聞 曹植令云為東郡太守王機防輔令倉輯等所誣又云到雍為監官所舉袁子曰皆寄地空名而無其實無朝聘會盟游獵不得過三十里設防輔監國伺察之思為布衣不

能得又袞來朝犯京都禁詔以議親之典議之有司固執詔

削縣二戶七百五十

燕王宇傳明帝疾篤拜宇為大將軍屬以後事宇深固

讓帝意亦變遂免宇官 初以宇及夏侯爽曹肇秦朗輔政劉放孫資與獻肇不平

勸用司馬懿及爽後魏竟為晉篡

魏氏春秋宗室曹罔上書曰子弟王空虛之地君有不使之民宗室竄於閭閻不聞邦國之政權均匹夫勢齊凡庶內無深根不拔之固外無盤石宗盟之助且州牧



郡守宗室子弟無一人廁其間與相維制非所以強幹弱支也今之用賢或超為名都之主或為偏師之帥而宗室有文者必限小縣之宰有武者必置百人以上非所以衰異之禮也

曹爽不能納

陳思王植傳嘗乘車行馳道中開司馬門出太祖大怒公車令坐死由是重諸侯科禁

魏氏春秋時待諸侯國法峻植及白馬王彪還

國欲同路東歸以敘闊思監國使者不聽

趙王幹傳太祖受命重諸侯賓客交通之禁乃使與犯妖惡同高祖踐阼申著諸侯不朝之令若有詔得詣京

都

曹植傳婚媾不通兄弟乖絕願使諸國慶問四節得展以敘骨肉妃妾之家膏沐之遺歲得再通

趙王幹傳九族時節集會

王家或非其時皆違禁防

又時法制待藩國既峻寮屬皆賈豎下才兵人給其殘

老大數不過二百人植以前過事事復減半

注引魏略所得兵百

五十人虎賁官騎及親事凡二百餘人就之諸國國有士子合不過五百人又被鴻臚所下

發士息書期會甚急

注士息前後三送兼人已竭其遺孤稚弱在者無幾而復被取

文帝誅曰顧衰絰以輕舉兮迫關防之我嬰是大喪不



得奔臨也

植欲祭先王於河上博士以為庶子不得祭宗廟詔答

文帝集

景初中詔收黃初中諸奏植罪狀公卿已下議尚書秘書中書三府大鴻臚者皆削除之撰錄植所著賦頌詩銘雜論凡百餘篇副藏內外

太和五年詔曰古者諸侯朝聘所以敦睦親親協和萬國也先帝著令不欲使諸王在京都者謂幼主在位母后攝政防微以漸關諸盛衰也朕惟不見諸王十有二

載悠悠之懷能不興思其令諸王及宗室公侯各將適

子一人朝後有少主母后在宮中者自如先帝令

六年詔曰古之帝王封建諸侯所以藩屏王室也秦漢

繼周或強或弱俱失厥中大魏創業諸王開國隨時之

宜未有定制非所以永為後世法也其改封諸侯王皆

以郡為國

青龍元年改封宗室女非諸王女皆為邑主

王凌謀立楚王彪夷三族悉錄諸王公置於鄴命有司

監察不得交關

晉書宣紀



嘉平六年司馬師廢齊王芳以太后令迎高貴鄉公髦  
於元城髦者東海定王霖之子也時王公皆錄置鄴故  
出髦而就元城迎之

通鑑注

景元元年髦殂迎常道鄉公於鄴爲明帝嗣及司馬昭  
以諸王公在鄴令山濤鎮之

太和三年詔曰禮皇后無嗣擇建支子以繼大宗則當  
纂正統而奉公義何得復顧私親哉漢宣繼昭帝後加  
悼考以皇號哀帝以外藩援立而董宏等稱引亡秦或  
誤時朝既尊恭皇立廟京都又寵藩妾使比長信敘昭

穆於前殿並四位於東宮僭差無度人神弗祐其令公  
卿有司深以前世行事爲戒後嗣萬一有由諸侯入繼  
大統則當明爲人後之義敢爲佞邪進諛時君妄建非  
正之號以干正統謂考爲皇稱妣爲后則股肱大臣誅  
之無赦其書之金策藏之宗廟著於令典

燕王上表稱臣詔曰古之王者或有所不臣王將宜依  
此義表不稱臣乎又當爲報夫後大宗者降其私親況  
所繼者重邪若便同之臣妾亦情所未安其依禮典處  
當務盡其宜有司奏以爲燕王章表可聽如舊式中詔



所施或存好問準之義類則晏覲之族也可加崇儀稱示不敢斥宜曰皇帝敬問大王侍御至於制書國之正典宜循法故曰制詔燕王凡詔命制書奏事上書諸稱燕王者可皆上平其非宗廟助祭之事皆不得稱王名奏事上書文書及吏民皆不得觸王諱以彰殊禮加於羣后上遵正典尊祖之制俯順聖敬烝烝之心可普告施行

蜀親屬

甘陵王永後主庶弟章武元年立為魯王建興八年改

封黃皓譖於後主不得朝見者十餘年鼎錄與魯王鼎銘曰富貴昌宜

侯王

安平悼王理亦後主庶弟章武元年立為梁王建興八年以魯梁在吳分界改封子哀王肩嗣卒子殤王承嗣卒詔以武邑侯輯襲王位輯理子也鼎錄與梁王鼎銘曰大吉祥宜公王後主太子璿延熙元年立咸熙元年鍾會作亂於成都為亂兵所殺

安定王瑤延熙元年立西河王琮十五年立新平王瓚十九年立北地

王湛 新興王恂 上黨王虔 皆後主子



按注引蜀世譜詢下次璩疑卽虔也形近誤

吳親屬

孫登權長子爲皇太子權遷都建業登鎮武昌領宮府  
留事赤烏四年卒吳書曰初葬句容置園邑奉子璠希  
皆早卒次子英封吳侯自殺國除

江表傳權使登出征軍次安樂羣臣莫敢諫琮曰古  
來太子未嘗偏征故從曰撫軍守曰監國今太子東  
出臣切憂疑卽命旋軍

孫慮登弟黃武七年封建昌侯僕射存丞相雍等議宜授

任偏方爲國鎮衛於是假節開府治半州卒無子國除

孫和慮弟赤烏五年立爲太子後王夫人憂死和寵稍損

魯王霸覬覬滋甚權沈吟歷年遂幽閉和徙故鄣太元

二年封南陽王遣之長沙徙新都賜死子皓卽位追諡

曰文皇帝吳麻曰和四子皓德謙俊德錢塘侯謙永安侯俊拜騎都尉

孫霸和弟爲魯王寵愛與和無殊和霸不穆權禁斷往來

太子敗霸亦賜死子基封吳侯壹宛陵侯皓卽位削爵

並徙烏傷縣

殷基通語權立和爲太子霸爲魯王初拜猶同宮室



禮秩未分羣公以為上下宜異於是分宮別寮而隙開矣自侍御賓客造為二端仇黨疑貳滋延大臣中外官僚舉國中分權患之於是有改嗣之規

陸遜傳二宮並闕職司多遣子弟給侍全琮子寄果附魯王為交構遜外生顧譚顧承以附太子流徙

陸凱傳先帝時諸王太子若取乳母其夫復役賜與錢財孫亮即位乳母常在左右

孫奮霸弟為齊王居武昌徙豫章坐殺傅相廢為庶人徙章安太平三年就封章安侯民間訛言奮當立皓聞誅

奮及其三子國除

諸葛恪上奮牋云大行皇帝寢疾遣諸王各就國科

禁嚴峻孫休傳云恪秉政不欲諸王在濱江兵馬之地徙休于丹陽郡

孫皓元興元年封休太子暉為豫章王次子汝南王次

子梁王次子陳王又送四子於吳小城復追殺大者二人

建衡元年立子為淮陽東平王

鳳皇二年改封淮陽為魯東平為齊又封陳留章陵等

九王凡十一王王給三千兵

天紀二年立成紀宣威等十一王王給三千兵



四年立中山代等十一王王給三千兵

陸抗傳諸王幼冲未統國事無用兵馬

是時政亂立王加多史皆略之故失其名

魏宗室

曹仁太祖從弟官至大司馬都督荆揚益州諸軍事封陳侯子泰嗣官至鎮東將軍假節轉封甯陵侯子初嗣又分封泰弟楷範皆為列侯

曹純仁弟以功封高陵亭侯子演嗣進封平樂鄉侯子亮嗣

曹洪太祖從弟官驃騎將軍封樂成侯子馥嗣子震分戶別封洪族父瑜官衛將軍封列侯

曹休太祖族子官大司馬都督揚州封安陽鄉侯子肇嗣薨子興嗣肇弟纂分戶封列侯

曹真太祖族子魏略曰本姓秦官大司馬賜劍履上殿入朝不趨封邵陵侯子爽嗣明帝詔封真五子義訓則彥皚皆

列侯真弟彬列侯文帝時分戶封宗人曹遵事太祖早亡真乞分封賜遵子爵關內侯百戶爽齊王時輔政改封武

安侯官大將軍都督中外諸軍事為司馬懿所殺夷三



族嘉平中紹功臣世封真族孫熙為新昌亭侯以奉真後

吳宗室

孫靜堅季弟官昭義中郎將子瑜奮威將軍領丹陽太守次皎征虜將軍次奐揚威將軍封沙羨侯瑜子曼至將軍封侯皎子肩丹陽侯無子弟晞嗣晞弟咨彌儀皆將軍封侯奐子壹奔魏  
孫賁父羌堅同產兄早卒賁征虜將軍領豫章太守都亭侯子鄰嗣進封都鄉侯威遠將軍卒子苗嗣苗弟旅

及叔父安熙績皆歷列位

孫輔賁弟領交州刺史遣使通曹公事覺幽繫卒子興

昭偉昕皆歷列位

孫紹策子封吳侯後改封上虞侯卒子奉嗣孫皓時訛

言奉當立誅死

孫翊一名儼權弟領丹陽太守子松射聲校尉都鄉侯

裴注權尚有庶弟朗一名仁

孫匡翊弟定武中郎將以罪別族為丁氏子泰長水校

尉泰子秀奔晉江表傳皓改秀姓曰厲



孫韶伯父河本姓俞孫策賜姓列之屬籍

吳書曰河堅族子出後姑

俞氏後復姓為孫

為將軍韶揚威將軍封建德侯子越嗣越兄

楷歸晉

孫桓河子建武將軍封丹徒侯

孫峻靜之曾孫父恭散騎侍郎峻為丞相封富春侯

孫綝與峻同祖為丞相封永甯侯弟恩據幹闔皆封侯

後被誅除屬籍

魏外戚

武宣太后傳太和四年明帝追諡太后祖父廣曰開陽

恭侯父遠曰敬侯母周封陽都君及恭侯夫人皆贈以

印綬弟秉黃初七年封開陽侯

魏書帝為秉起第太后幸第請諸外親厨無異

膳每見不假以顏色

子蘭嗣薨子暉嗣又分秉爵封蘭弟琳為列

侯

文昭甄后傳父逸太和元年追封魏昌之安成鄉諡曰

敬侯適孫像嗣

后兄儼追諡安成鄉穆侯青龍四年改逸儼本封皆曰魏昌侯

青龍三

年薨追封魏昌侯子暢嗣又封昌弟温韡皆為列侯

景初末為暢起大第車駕親臨之又於後園為像母起觀廟名其里曰渭陽里暢薨子紹嗣青

龍中又封后從兄子毅及像弟三人皆為列侯嘉平中



復封暢子二人為列侯

文德郭后傳蚤喪兄弟從兄表封觀津侯

追封父永為觀津敬侯世

婦董為堂陽君兄淳為梁里亭戴侯都為武城亭

子詳

孝侯成為新樂亭定侯皆使使奉策祠以大牢

嗣又分表爵封詳弟述為列侯詳薨子釗嗣

明悼毛后傳父嘉封博平鄉侯嘉本典虞車工卒暴富

貴明帝令朝臣會其家飲晏其容止甚蚩駮語輒自謂

侯身人以為笑薨改封安國侯母夏為野王君后弟曾為原武

典農

明元郭后傳父滿追封西都定侯以叔父立子建紹其

爵母杜為郃陽君

立及從父芝建兄德皆封列侯掌宿衛魏略曰芝

先自以他功封侯德封平原侯襲平原公主爵承甄氏後

黃初中文帝欲追封太后父母尚書陳羣奏曰典籍之

文無婦人分土命爵之制在禮婦因夫爵秦違古法漢

氏因之非先王之令典也帝曰此議是也其勿施行以

作著詔下藏之臺閣永為後式卞后傳

魏略孟康字公休安平人黃初中以於郭后有外屬

并受九親賜拜遂轉為散騎常侍是時散騎皆以高

才英儒充選而康獨緣妃嬪雜在其間故於時其輕



之號為阿九

孟康注漢書陳志無傳攷郭后傳言姊子孟武則康其族耳

蜀外戚

先主穆皇后兄吳壹官至車騎將軍封縣侯

弟班驃騎將軍封縣

侯竹

吳外戚

孫堅吳夫人弟景丹陽太守子奮授兵為將封新亭侯

祺都亭侯

孫權謝夫人弟承武陵太守子崇揚威將軍勛吳郡太

守

徐夫人兄矯嗣父琨廣德侯無子弟祚襲以戰功至平

魏將軍

王夫人生休休即位王氏無後封同母弟文雍為亭侯

潘夫人姊輸織室請出嫁譚紹孫亮即位以紹為騎都

尉授兵

孫亮全夫人父尚封永平侯全氏侯五人並典兵後全

懌全端全儀等降魏尚徙零陵見殺

孫和何姬皓即位為皇太后封弟洪永平侯蔣溧陽侯

植宣城侯官至大司徒



孫皓滕夫人父牧封高密侯拜衛將軍錄尚書事夫人寵衰牧遣居蒼梧郡道死

三國會要卷二終

三國會要卷三 八十八 六百四十一 黃巖楊晨纂

麻法

魏受命以四分麻久遠疏闊黃初中太史丞韓翊造黃初術以乾象互相參校其後陳羣奏請校議未定帝崩仍用四分明帝作太和麻景初元年楊偉上景初麻改定麻數以建丑之月爲正改其年三月爲孟夏四月其孟仲季月雖與正歲不同至於郊祀迎氣分至啟閉班宣時令皆以建寅爲正三年帝崩復用夏正以建寅月爲正始元年正月以建丑月爲後十二月



魏略太史上漢厯不及天時因更推步弦望朔晦為  
 太和厯帝以隆學問優深天文又精乃詔使隆與尙  
 書郎楊偉太史待詔駱祿參共推校偉祿是太史隆  
 故據舊厯更相劾奏紛紜數歲偉稱祿得日蝕而月  
 晦不盡隆不得日蝕而月晦盡詔從太史隆所爭雖  
 不得而遠近猶知其精微也高堂隆傳注 按隆傳  
 云改正朔易服色殊徽  
 號異器械自古帝王所以神明其政變民耳目故三  
 春稱正明三統也於是敷演舊章奏而改焉帝從其  
 議改青龍五年春三月為景初元年孟  
 夏四月服色尙黃犧牲尙白從地正也

乾象法以五百八十九之百四十五為斗分晉志黃初以

四千八百八十三之千二百五十為斗分宋志景初以千  
 八百四十三之四百五十五為斗分晉志

太史丞韓翊以為乾象減斗分太過後當先天造黃  
 初厯以四千八百八十三為紀法千二百五十為斗  
 分其後尙書令陳羣奏以為厯數難明前代通儒多  
 其紛爭黃初之元以四分厯久遠疏闊大魏受命宜  
 改厯明時韓翊首建猶恐不審故以乾象互相參校  
 其所校日月行度弦望朔晦三年更相是非不能決  
 案三公議皆綜盡典理殊塗同歸欲使效之璿璣各



盡其法一年之間得失定奏可太史令許芝云劉洪月行術用以來且四十餘年已復覺失一辰有奇孫欽議史遷造太初其後劉歆以爲疏復爲三統章和中改爲四分以儀天度考合符應時有差跌日蝕覺過半日至劉洪改爲乾象推天七曜之符與天地合其敘董巴議云聖人迹太陽於晷景效太陰於弦朧明五星於見伏正是非於晦朔弦朧伏見者厯數之綱紀檢驗之明著也徐岳議劉洪以厯後天潛精內思二十餘載參按漢家太初三統四分厯術課弦

朧於兩儀郭閒而月行九歲一終謂之九道九章百七十一歲九道小終九九八十一章五百六十七分而九終進退半前四度五分學者務追合四分但減一道六十三分分不下通是以疏闊皆由斗分多故也課弦朧當以昏明度月所在則知加時先後之意不宜用兩儀郭閒洪加太初元十二紀減十斗下分元起己丑又爲月行遲疾交會及黃道去極度五星術理實精密信可長行今韓翊所造皆用洪法少益斗下分所錯無幾翊所增減致亦留思然十術新立



三國會要 卷三  
猶未就悉至於日蝕有不盡效效麻之要要在日蝕  
熹平之際時洪爲郎欲改四分先上驗日蝕日蝕在  
晏加時在辰蝕從下上三分侵二事御之後如洪言  
海內識眞莫不聞見劉歆以來未有洪比夫以黃初  
二年六月二十七日戊辰加時未日蝕乾象術加時  
申半強於消息就加未黃初以爲加申強乾象後天  
一辰半強爲近黃初二辰半爲遠消息與天近三年  
正月丙辰朔加時申北日蝕黃初加酉弱乾象加午  
少消息加未黃初後天半辰近乾象先天二辰少弱

於消息先天一辰強爲遠天三年十一月二十九日  
庚寅加時西南維日蝕乾象加未初消息加申黃初  
加未強乾象先天一辰遠黃初先天半辰近消息乾  
象近中天二年七月十五日癸未日加壬月蝕乾象  
月加申消息加未黃初月加子強入甲申日乾象後  
天二辰消息後一辰爲近黃初後天六辰遠三年十  
月十五日乙巳日加丑月加未蝕乾象月加己半於  
消息加午黃初以丙午月加酉強乾象先天二辰近  
黃初後天二辰強爲遠於消息於乾象先一辰凡課



日月蝕五事乾象四遠黃初一近翊於課難徐岳乾象消息但可減不可加加之無可說不可用岳云本術自有消息受師法以消息為奇辭不能改故列之正法消息翊術自疏

木以三年五月二十四日丁亥晨見

黃初五月十七日庚辰見先七日  
乾象五月十五日戊寅見先九日

土以二年十一月二十六日壬辰見

乾象十一月二十一日丁亥見先五日  
黃初十一月十八日甲申見先八日

土以三年十月十一日壬申伏

乾象同壬申伏  
黃初以下十月七日戊辰伏先四日

土以三年十一月二十二日壬子見

乾象十一月十五日乙巳見先七日  
黃初十一月十二日壬寅見先十日

金以三年閏六月十五日丁丑晨伏

乾象六月二十五日戊午伏先十九日  
黃初六月二十二日乙卯伏先二十二日

金以三年九月十一日壬寅見

乾象以八月十八日庚辰見先二十二日  
黃初八月十五日丁丑見先二十五日

水以二年十一月十七日癸未晨見

乾象十一月十三日己卯見先四日  
黃初十一月十三日戊寅見先五日



水以二年十二月十三日己酉晨伏

乾象十二月十五日辛亥伏後二日  
黃初十二月十四日庚戌伏後一日

水以三年五月十八日辛巳夕見

乾象亦以五月十八日見  
黃初五月十七日庚辰見先一日

水以三年六月十三日丙午伏

乾象六月二十日癸丑伏後七日  
黃初六月十九日壬子伏後六日

水以三年閏六月二十五日丁亥晨見

乾象以閏月九日辛未見先十六日  
黃初閏月八日庚午見先十七日

水以三年七月七日己亥伏

伏後四日

乾象七月十一日癸卯伏後四日  
黃初以七月十日壬寅伏後三日

水以三年十一月日於暑度十四日甲辰伏

乾象以十一月九日己亥伏先五日  
黃初十一月八日戊戌伏先六日

水以三年十二月二十八日戊子夕見

二麻同以十二日壬  
申見俱先十六日

凡四星見伏十五

乾象七近二中  
黃初五近無一中

郎中李恩議以太史天度與相覆校三年七月三年

十一月望與天度日皆差異月蝕加時乃後天六時

半非從三度之謂定為後天過半日也董巴議曰昔



伏羲始造八卦作三畫以象二十四氣

原注卦各三畫八卦則二

十四畫故象一歲月節中氣二十四氣

黃帝因之初作調厯歷代十一

更年五千凡有七厯

原注黃帝少昊顓頊高辛唐虞夏殷周秦漢十一代五千年也

七厯黃帝顓頊夏殷周魯三統也

顓頊以今之孟春正月為元其時

正月朔旦立春五星會於天廟營室也冰凍始泮蟄

蟲始發雞始三號天曰作時地曰作昌人曰作樂鳥

獸萬物莫不應和故顓頊聖人為厯宗也湯作殷厯

不復以正月朔旦立春為節更以十一月朔旦冬至

為元首下至周魯及漢皆從其節據正四時夏為得

天以承堯舜從顓頊故也禮記大戴曰虞夏之厯建

正於孟春此之謂也尚書即楊偉謂六十日中疏密

可知不待十年若不從法是校方圓棄規矩考輕重

背權衡課長短廢尺寸論是非違分理若不先定校

厯之本法而縣聽棄法之末爭則孟軻所謂方寸之

木可使高於岑樓者也今韓翊據劉洪術者知貴其

術珍其法而棄其論背其術廢其言違其事是非必

使洪奇妙之式不傳來世若知而違之是挾故而背

師也若不知據之是為挾不知而罔知也按議未定



會不卒而罷

楊偉上景初厯表曰臣前以制典餘日推考天路稽之前典驗之食朔詳而精之更建密厯則不先不後古今中天以昔在唐帝協日正時允釐百工咸熙庶績也欲使當今國之典禮凡百制度皆蹈合往古郁然備足乃改正朔更厯數以大呂之月爲歲首以建子之月爲厯初臣以爲昔在帝代則法曰顓頊曩自軒轅則厯曰黃帝暨至漢之孝武革正朔更厯數改元曰太初因名太初厯今改元爲景初宜曰景初厯

臣之所建景初厯法數則約要施用則近密治之則省功學之則易知雖復使研桑心算隸首運籌重黎司晷羲和察景以考天路步驗日月究極精微盡術數之極者皆未能竝臣如此之妙也是以累代厯數皆疏而不密自黃帝以來常改革不已壬辰元以來至景初元年丁巳歲積四千四十六算止此元以天正建子黃鍾之月爲厯初元首之歲夜半甲子朔旦冬至

元法萬一千五十八



紀法千八百四十三

紀月二萬二千七百九十五

章歲十九

章月二百四十五四宋志作三

章閏七

通數十三萬四千六百三十

日法四千五百五十九

餘數九千六百七十

周天六十七萬三千一百五十

紀歲中十二宋志紀下五朔日

氣法十二有日字

沒分六萬七千三百一十五

沒法九百六十七

月周二萬四千六百三十八

通法四十七

會通七十九萬百一十宋志作一百二十

朔望合數六萬七千三百一十五

入交限數七十三宋志作二萬二千七百九十五



通周十二萬五千六百二十一

周日日餘二千五百二十八

周虛二千三十一

斗分四百五十五

宋志云景初日中晷景即用漢四分法是以漸就

乖差其推五星則甚疏闕宋志全載偉法晉志節之今亦從略

劉氏在蜀不見改麻當是仍用漢四分法

吳黃武二年改四分用乾象麻

闕澤傳著乾象麻注以正時日郝經云澤受乾象法于劉洪而徐岳又加

注解誤也按晉宋志並言澤受洪法于岳又加注解王蕃以洪術精妙用推渾天之理以制儀器及論故孫氏用乾象麻也

諸家之麻各有異同漢靈之末四分麻與天違錯時會稽東部都尉泰山劉洪善於推候乃考術官及史自古至今麻法原其進退之行察其出入之驗視其往來度其終始課較其法不能四分之一減以爲五百八十九分之一百四十五更造乾象麻以追日月五星之行比於諸家最爲精密今史官所用則其麻也故所作渾象諸分度節次及昏明中星皆更以乾



象法作之周天一百七萬一千里以乾象法分之得二千九百三十二里八十步三尺九寸五分弱斗下分爲七百二十一里二百五十九步四尺五寸二分弱乾象全度張古麻零度九步一尺二寸一分弱斗下分減古麻斗下分十一里五十八步六寸六分弱其大數俱一百七萬一千里斗下分減則全度純數使其然也

隋書天文志永元十四年詔用夏麻漏刻依日行黃道去極每差二度四分爲增減一刻凡用四十八箭

終於魏晉相傳不改

劉徽九章算術注序曰周大司徒職夏至日中立八尺之表其景尺有五寸謂之地中說云南戴日下萬五千里夫云爾者以術推之按九章立四表望遠及因木望山之術皆端旁互見無有超邈若斯之類然則蒼等爲術猶未足以博盡羣數也徽尋九數有重差之名原其指趣乃所以施於此也凡望極高測絕深而兼知其遠者必用重差句股則必以重差爲率故曰重差也立兩表於洛陽之城令高八尺南北各



三國會要 卷三  
盡平地同日度其正中之時以景差爲法表高乘表  
閒爲實實如法而一所得加表高卽日去地也以南  
表之景乘表閒爲實實如法而一卽爲從南表至南  
戴日下也以南戴日下及日去地爲句股爲之求弦  
卽日去人也以徑寸之筭南望日日滿筭空則定筭  
之長短以爲股率以筭徑爲句率日去人之數爲大  
股大股之句卽日徑也雖天圓穹之象猶曰可度又  
況泰山之高與江海之廣哉微以爲今之史籍且略  
舉天地之物考論厥數載之於志以闡世術之美輒

造重差并爲注解以究古人之意綴於句股之下度  
高者重表測深者累矩孤離者三望離而又旁求者  
四望觸類而長之則雖幽遐詭伏靡所不入博物君  
子詳而覽焉



三國會要卷三終

三國會要卷四

黃巖楊晨纂

天文

陸績吳人善天文始推渾天意

本傳云作渾天圖

王蕃廬江人

吳時為中常侍傳劉洪乾象厯依法而制渾儀作渾天

象說曰虞書稱在璇機玉衡以齊七政則今渾天儀日

月五星是也鄭元說動運為機持正為衡皆以玉為之

視其行度觀受禪是非也渾儀義和舊器歷代相傳謂

之機衡其所由來有原統矣而斯器設在候臺史官禁

密學者寡得聞見穿鑿之徒不解機衡之義見有七政



之言因以為北斗七星構造虛文託之讖緯史遷班固  
 猶尚惑之鄭元有贍雅高遠之才沈靜精妙之思超然  
 獨見改正其說聖人復出不易斯言矣已上見宋書天文志渾儀  
 以察三光分宿度象以著天體布星辰按斯二者以考  
 於天蓋詳察矣已上見北堂書鈔一百三十幽平之後周室遂卑天  
 子不能頒朔魯歷不正百有餘年以建申之月為建亥  
 而怪蟄蟲不伏也歷紀廢壞道術侵亂渾天之義傳之  
 者寡末世之儒或不聞見各以私意為天作說故有周  
 髀宣夜之論宣夜之學絕無師法周髀見行於世考驗

天狀多所違失依劉洪乾象歷之法而論渾天曰太平御覽

二引有渾天之作由來尚矣考之前儒舊說天地之體

於天信而有徵當是開元占經刪狀如鳥卵天包地外猶殼之裏黃也周旋無端其形渾

渾然故曰渾天也周天三百六十五度五百八十九分

度之百四十五東西南北展轉周規北堂書鈔周作同半覆地

上半在地下故二十八宿半見半隱以赤儀準之其見

者常百八十二度有奇是以察知其半覆地上半隱地

下其二端謂之南極北極天之中也北極在正北出地

三十六度南極在正南入地亦三十六度兩極相去一



三國會要 卷四  
天文  
百八十二度半強眾星皆移而北極不徙猶車輪之有  
輻軸也繞北極徑七十二度常見不隱謂之上規繞南  
極七十二度常隱不見謂之下規是也上規去南極下  
規去北極皆一百四十四度半強以二規於渾儀爲中  
規赤道帶天之絃去兩極各九十一度少強黃道日之  
所行也半在赤道外半在赤道內與赤道東交於角五  
少弱西交於奎十四少強其出赤道外極遠者出赤道  
二十四度斗二十一度是也其入赤道內極遠者入赤  
道二十四度井二十五度是也日南至在斗二十一度

去極百一十五度少強是日最南去極最遠故景最長  
黃道斗二十一度出辰入申故日出辰入申晝行地上  
百四十六度強故日短夜行地下二百一十九度少弱  
故夜長自南至之後日去極稍近故景稍短日晝行地  
上度稍多故日稍長夜行地下度稍少故夜稍短日行  
度稍北故日出入稍北以至於夏至日在井二十五度  
去極六十七度少強是日最近北去極最近故景最短  
黃道井二十五度出寅入戌晝行地上二百一十九度  
少弱故日長夜行地下百四十六度少強故夜短自夏



至之後日去極稍遠故景稍長日晝行地上度稍少故日稍短夜行地下度稍多故夜稍長日所在度稍南故出入稍南以至於南至而復初焉斗二十一度并二十五度南北相較四十八度春分日在奎十四少強秋分日在角五少弱此黃赤二道之交中也去極俱九十一度少強南北處斗二十一并二十五之中故景居二至長短之中奎十四角五出卯入酉故日亦出卯入酉日晝行地上夜行地下俱百八十二度半強故日見之漏五十刻不見之漏五十刻謂之晝夜同夫天之晝夜以

日出入為分人之晝夜以昏明為限日未出二刻半而明日入後二刻半而昏故損夜五刻以增晝刻是以春秋分之漏晝五十五刻渾天遭周秦之亂師徒斷絕而喪其文唯渾儀尚在候臺北堂書鈔尚作常是以不廢故其法可得言太平御覽二法作揚推至於纖微委曲闕而不傳御覽有為精微深妙百世不易之道周天里數無聞焉爾而洛書甄曜度春秋考異郵皆云周天一百七萬一千里至以日景驗之違錯甚多然其流行布在眾書通儒達士未之考正是以不敢背捐舊術獨據所見故按其說更課諸數以究



其意也古歷皆云周天三百六十五度四分度之一皆分一百七萬一千里數為一度得二千九百三十二里七十一步二尺七寸四分大強案宋書天文志及晉書天文志大強二字皆作四百八十七分分之三百六十二開元占經改之也斗下分宋晉志未引大弱二字當亦是占經改斗下分為七百三十三里一十七步五尺一寸八分大弱三光之行不必有常術家以算追而求之故諸家之歷各有異同漢靈之末四分歷與天違錯時會稽東部都尉太山劉洪善於推候乃考術官及史自古至今歷法原其進退之行察其出入之驗視其往來度其終始課較

其法不能四分之一減以為五百八十九分之一百四十五更造乾象歷以追日月五星之行比於諸家最為精密今史官所用則其歷也故所作渾象諸分度節次及昏明中星皆更以乾象法作之周天一百七萬一千里以乾象法分之得二千九百三十二里八十步三尺九寸五分弱斗下分為七百二十一里二百五十九步四尺五寸二分弱乾象全度張古歷零度九步一尺二寸一分弱斗下分減古歷斗下分十一里五十八步六寸六分弱其大數俱一百七萬一千里斗下分減則全



三國會要 卷四 天文 五  
度純數使其然也又陸續云周天一百七萬一千里東西南北徑三十五萬七千里立徑亦然此蓋天黃赤道之徑數也渾天蓋天黃赤道周天度同故績取以言耳此言周三徑一也古少廣術用率圓周三中徑一臣更考之徑一不翅周三率周百四十二而徑四十五以徑率乘一百七萬一千里以周率約之得徑三十三萬九千四百五里一百二十二步三尺二寸一分七十一分分之十東西南北及立徑皆同半之得十六萬九千七百二里二百一十一步一尺六寸百四十二分分之八

十一地上去天之數也夫周天徑目前定物圖蓋天者尚不考驗而乃論天地之外日月所不照陰陽所不至目精所不及儀衡所不測皆爲之說虛誕無徵是亦鄒子瀛海之類也臣謹更以晷景考周天里數按周禮大司徒之職立土圭之法測土深正日景以求地中日南則景短多暑日北則景長多寒日東則景夕多風日西則景朝多陰日至之景尺有五寸謂之地中鄭眾云土圭之長尺有五寸以夏至立八尺表中景適與圭等謂之地中今潁川陽城地爲然鄭元云凡日景於地千里



而差一寸景尺有五寸者南戴日下萬五千里也誠以八尺之表而有尺五寸景是立八十而旁十五也南萬五千里而當日下則日當去其下地八萬里矣從日斜射陽城則天徑之半也天體圓如彈丸地處天之半而陽城爲中則日春秋冬夏昏明晝夜去陽城皆等無盈縮矣故知從日斜射陽城爲天徑之半也以句股之法言之旁萬五千里則句也立八萬里則股也從日斜射陽城則弦也以句股求弦法入之得八萬一千三百九十四里三十步五尺三寸六分天徑之半而地上去天

之數也倍之得十六萬二千七百八十八里六十一歩四尺七寸二分天徑之數也以周率乘之徑率約之得五十一萬三千六百八十七里六十八歩一尺八寸二分周天之數也減甄曜度考異郵五十五萬七千三百一十二里有奇一度凡一千四百六里百二十四歩六寸四分十萬七千五百六十五分分之一萬九千四十九減舊度千五百二十五里二百五十六歩三尺三寸二十一萬五千一百三十分分之十六萬七百三十夫末世之儒多妄穿鑿減增河洛竊作讖緯其言浮虛難



悉據用六官之職周公所制句股之術目前定數晷景之度事有明驗以此推之近為詳矣黃赤二道相與交錯其間相去二十四度以兩遊儀準之二道俱三百六十五度有奇隋書天文志引此下有又赤道見者常百八十二度半強當是占經又南北考之天見者亦一百八十二度半強當是占經是以知天體圓如彈丸隋志刪此下有南北極相去一百八十二度半強也當是占經刪太平御覽二引與隋志同而陸績造渾象其形如鳥卵然則黃道應長於赤道矣績云天東西南北徑三十五萬七千里然則績亦以天形正圓也而渾象為鳥

卵則為自相違背隋志引作而陸績所作渾象形如鳥卵以施二道不得如法若使二道同規則其間相去不得滿二十四度若令相去二十四度則黃道當長於赤道又兩極相去不翅百八十二度半強案績說云天東西徑三十五萬七千里直徑亦然則績意亦以天為正圓也器與言謬頗為乖僻當是占經刪月行二十七日有奇而周天其行半出黃道外半入黃道內在內謂之陰道在外謂之陽道其行陰陽道極遠者不過六度黃道無常諸家各異各依其厯節氣所行宿度尚書月令太初三統四分乾象各不同昏明亦異日行蹉跌不遵常軌之所為也夫三光之行雖有盈縮天地之體常然不變故諸家之厯皆不著渾象為黃



道當各隨其歷而錯之而今臣所施黃道乾象法也審校春秋二分於一先代諸歷差而冬夏二至恆在二分張中蕃按渾象之法地當在天中其勢不便故反觀其形地為外匡於已解人無異在內詭狀殊體而合於理可謂奇巧古舊渾象以二分為一度凡周七尺三寸半分漢張衡更制以四分為一度凡周一丈四尺六寸一分臣以古制局小以布星辰相去稠穢不得了察而張衡所作又復過大難可轉移前表聞以三分為一度事許令臣所作周一丈九寸五分四分分之三張古法三

尺六寸五分四分分之一減張衡亦三尺六寸五分四分分之一渾象法黃道赤道各廣一度有半故今所作渾象黃赤道各廣四分半相去七寸二分渾儀中筭為璇機外規為玉衡開元占經宋志又云張衡所造渾儀傳至魏晉沈沒戎虜績蕃器亦不存

隋志吳時有葛衡明達天官能為機巧改作渾天使地居于天中以機動之天動而地止以上應晷度裴注

引晉陽秋略同御覽作葛衡字思真

吳姚信听天論以為天北高南下若車之軒地形立



於下天象運乎上譬如人為靈蟲形最似天今人頤前侈臨胷而項不能覆背近取諸身故知天之體南低入地北則偏高也又冬至極低而天運近南故日去人遠而斗去人近北天氣至故冰寒也夏至極起而天運近北故斗去人遠日去人近南天氣至故蒸熱也極之高時日所行地中淺故夜短天去地高故晝長也極之低時日所行地中深故夜長天去地淺故晝短也然則天行寒依于渾夏依于蓋也晉志宋志

隋志虞喜安天論太史令陳季胄以先賢制木為儀名

曰渾天

陳季胄隋天文志云吳太史令陳苗也

虞聳穹天論天形穹隆

當如雞子幕其際周接四海之表浮于元氣之上譬如覆匳以抑水而不沒者氣充其中故也日繞辰極沒西而還東不出入地中天之有極猶蓋之有斗也天北下于地三十度極之傾在地卯酉之北亦三十度人在卯酉之南十餘萬里故斗極之下不為地中當對天地卯酉之位耳日行黃道繞極極北去黃道百十五度南去黃道六十七度二至之所舍以為長

短也

同上按御覽引虞聳穹天論同惟如雞子作如笠聳皆虞翻子也



占候

宋志建安二十二年四星聚二十五年魏文受禪

魚豢云五星聚冀而魏有天下按蜀志是太白熒惑填星從歲星無五星也其二十五年熒惑復追歲星見在胃昴

臣亦引為劉備之應按此與漢末術士言黃旗紫蓋見於斗牛之間江東有天子氣陳化

刀元以為吳瑞蓋皆術家傳會之文至國山碑所言祥瑞尤多誣妄今不錄

又按分野之說雖出古法亦多傳會晉志載諸葛亮譙周陳卓所言分野不同今亦不錄

景曜元年史官言景星見於是大赦改年

諸葛亮知乾象

上先主書云亮算太乙數今年歲次癸巳星在西方又觀乾象太白臨

于維城之分主于將帥多凶少吉見百三名家集引太乙飛鉗周羣專心候業本傳先主

欲爭漢中羣曰得地不得民張裕亦曉占候日歲在庚子天

出徧軍必不利子巨傳其術下當易代劉氏祚盡矣主益州九年之後寅杜

卯之間當失之後魏氏之立先主之薨皆如所刻瓊傳內學譙周通緯頗曉天文玉海引謝沈書云蔡邕撰建武以來星驗

著明以續前志譙周接繼其下

黃初二年六月戊辰晦日有食之有司奏免太尉詔曰

災異之作以譴元首而歸過股肱豈禹湯罪已之義其

令百官各虔厥職後有天地之眚勿復劾三公正始八

年二月庚午朔日有蝕之是時曹爽專政丁謐鄧颺等

改法度會有日蝕之變詔羣臣問得失蔣濟上疏曰昔



大舜佐治戒在此周周公輔政慎于其朋齊侯問災晏子對以布惠魯君問異臧孫荅以緩役塞變應天乃實人事濟旨譬甚切而君臣不悟終至敗亡

正元二年史官荅大將軍云自漢故事日食必當於交

甲寅詔書有備食之制無考負之法宋志

吳赤烏十一年二月白虹貫日權發詔戒懼晉志按吳志無文裴

注載權詔乃因地震而發

吳太史陳卓始列甘石巫咸三家星官著于圖錄并

注占贊隋志按開元占經所載卓說尚多吳錄曰吳範善占候知風

氣御覽引範占候風氣祕訣晉紀趙達曰吳衰庚子歲五十八年

黃初四年十一月月暈北斗月變凡占驗不錄

太和五年十二月甲辰月犯鎮星 青龍二年十月乙

丑月犯鎮星戊寅月犯太白 四年三月己巳太白與

月俱加丙晝見月犯太白 景初元年十月丁未月犯

熒惑

嘉平元年正月甲午太白襲月

太和四年十一月壬戌太白犯歲星 青龍二年二月

乙未太白犯熒惑以上月五星相犯



黃初四年三月癸卯月犯心大星十二月丙子又犯

六月甲申太白晝見 五年十一月辛卯又晝見按本紀作

十月已卯 五年十月歲星入太微逆行積百三晉志作四十

九日乃出 六年五月壬戌十六日熒惑入太微至壬申

與歲星相及俱犯右執法至癸酉乃出蜀記明帝問黃

何地為正對曰當驗天文往者熒惑守心而文帝崩吳

蜀無事此其徵也案三國志並無熒惑守心之文宜是

入太 太和五年五月熒惑犯房占曰房四星將相位也

憂 十一月乙酉月犯軒轅大星 六年三月乙亥又犯

十一月丙寅太白晝見南斗歷八十餘日恆見 青龍

二年三月辛卯月犯輿鬼 五月丁亥太白晝見積三

十餘日 七月己巳月犯樞閉 三年六月丁未鎮星

犯井鉞四年閏四月乙巳復犯 戊戌太白又犯之 七

月己丑鎮星犯東井距星 十月壬申太白晝見在尾

歷二百餘日恆見 十二月戊辰月犯鉤鈐 四年二

月太白復晝見月犯太白又犯軒轅一星入太微而出

明帝紀 三月癸卯填星犯東井宋志在參 五月壬寅太白犯畢

左股第一星 七月甲寅太白犯軒轅大星 景初元

年二月乙酉月犯房第二星 七月辛卯太白晝見積



二百八十餘日晉志二年二月己丑月犯心距星又犯心

中央大星五月乙亥又犯閏十一月又犯心中中央大星十月甲午月犯箕

正始元年四月戊午月犯昴東頭第一星 十月庚寅

月犯昴北頭第四星二見晉志二年九月癸酉月犯輿鬼西

北星 三年二月丁未又犯西南星 四年十月十一

月月再犯井鉞 五年十一月癸巳鎮星犯亢南星

七月癸丑鎮星犯樞閉 嘉平元年六月壬戌太白犯

東井距星 四月辛巳太白犯輿鬼 二年三月己未

太白又犯井距星 十月丙申晉志作十二月月犯輿鬼王凌傳是

年熒惑守南斗凌謂斗中有星當有暴貴者浩詳言  
當有王者興謀迎立楚王史書於吳赤烏十三年三

年四月戊寅月犯東井 五月甲寅月犯亢距星 七

月己巳月犯輿鬼九月乙巳又犯之 十月癸未熒惑

犯亢南星 四年十一月丁未犯鬼積尸 五年六月

戊午太白犯角 庚辰月犯箕 七月月犯井鉞丙午

又犯鬼西北星 十一月癸酉月犯東井距星 正元

二年二月戊午熒惑犯東井北轅西頭第一星 甘露

五年七月乙卯熒惑犯井鉞 壬戌月犯鉞星 八月

辛亥月犯箕宋志九月丁巳月犯東井 二年六月己



酉月犯心中央大星 八月壬子歲星犯井鉞 九月  
庚寅歲星逆行乘鉞星 十月丙寅太白犯亢距星

三年二月庚子太白犯東井是夜歲星又犯之 八

月壬辰歲星犯輿鬼鑽星 四年四月甲申歲星又犯

輿鬼東南星 景元元年二月月犯建星 二年四月

熒惑入太微犯右執法 四年十月歲星守房

蜀後主建興十二年有長星赤而芑角西南流 投諸葛亮營三

投再還往大還小 吳孫權赤烏十三年五月日北至熒惑入南斗 七月犯魁第三

星而東 孫亮五鳳元年有星弗於斗牛 太平元年九月

壬辰太白犯南斗 以上月十五星犯列人皆

黃初三年九月甲辰客星見太微左掖門內 六年十

月乙未星孛於少微歷軒轅 太和六年十一月丙

寅有星孛於翼近太微上將星 青龍四年十月甲申

有星孛於大辰長三尺乙酉又孛於東方 十一月己

亥彗星見犯宦者天紀星 景初二年八月彗星見張

長三尺逆西行四十一日滅 漢晉春秋曰史官言此周之分野洛邑惡之於是大

修禳禱之術 八月丙寅夜有大流星長數十丈色白有芑東



北流

陸襄平城外公孫淵突走斬于陸所

十月癸巳客星見危逆行在

離宮北騰蛇南甲辰犯宗星已酉滅

正始元年十月

乙酉彗星見西方在尾長三丈拂牽牛犯太白十一月

甲子進犯羽林

六年八月戊午彗星見七星長二尺

色白至張積二十三日滅

七年十一月癸亥又見軫

長一尺積百五十六日滅

九年三月又見昴長六尺

色青白芒西南指

七月又見翼長二尺進至軫積四

十二日滅

嘉平三年十一月癸未

晉志有星孛於營

室西行積九十日滅

四年二月丁酉彗星見西方在

胃長五六丈色白芒南指貫參積二十日滅

五年十

一月彗星見軫長五丈在太微左執法西東南指積百

九十日滅

正元元年十一月白氣出南斗側廣數丈

長竟天

王肅曰蚩尤旗也東南其有亂乎又二年彗星史書於吳五鳳元年

甘露二年十

一月彗星見角色白

四年十月丁丑客星見太微中

轉東南行歷軫宿積七日滅

景元三年十一月壬寅

彗星見亢色白長五丈轉北行積四十五日滅

四年

六月大流星二竝如斗見西方分流南北光照地隆隆

有聲

咸熙二年五月彗星見王良長丈餘色白東南



三國會要

卷四

指積十二日滅

以上  
星變

三國會要卷四終



